



Na osnovu člana 69. Zakona o hartijama od vrijednosti («Službeni glasnik Brčko distrikta BiH» broj: 15/03) i člana 14. Pravilnika o registraciji i prenosu hartija od vrijednosti kod Komisije za hartije od vrijednosti Brčko distrikta BiH, Centralni registar Brčko («Službeni glasnik Brčko distrikta BiH» broj: 43/04 od 19.11.2004.godine), Komisija za hartije od vrijednosti Brčko distrikta BiH na sjednici održanoj 10.12.2004. godine, donijela je

U P U T S T V O

o načinu određivanja oznaka papirima od vrijednosti

I

Ovim Uputstvom uređuje se način određivanja oznaka papirima od vrijednosti koji se prema članu 1. Pravilnika o registraciji i prenosu hartija od vrijednosti kod Komisije za hartije od vrijednosti Brčko distrikta BiH, Centralni registar Brčko registruju u Centralnom registru Brčko.

OZNAKA PAPIRA OD VRIJEDNOSTI

II

Oznaka papira od vrijednosti sastoji se od minimalno pet, a maksimalno sedam slovnih i brojčanih znakova.

Oznaka papira od vrijednosti sastoji se:

- oznake emitenta papira od vrijednosti
- oznake vrste i klase papira od vrijednosti
- oznake korporativne akcije na papiru od vrijednosti

OZNAKA EMITENTA PAPIRA OD VRIJEDNOSTI

III

Oznaka emitenta papira od vrijednosti se definira od tri slova i jednog brojanog znaka. Prilikom definiranja oznake treba, po mogućnosti izbjegavati samoglasnike, te ne koristiti slova sa kvačicama.

Prva dva slova u oznaci određuju se iz naziva emitenta.

Treće slovo dodjeljuje se prema djelatnosti emitenta kako slijedi:

- B- banka
- O- osiguravajuće društvo
- D- društvo za upravljanje fondom
- F- privatizacioni investicioni fond

Ukoliko emitent ne ispunjava uslove za dodjelu trećeg slova, onda se treće slovo u oznaci emitenta određuje prema prvom slovu grada u kojem je sjedište emitenta. Ukoliko grad u kojem je sjedište emitenta počinje sa slovima B, O, F i D, tada se to slovo zamjenjuje za prvi naredni suglasnik u nazivu grada.

Četvrti znak je broj 9.

U slučaju promjene naziva emitenta, oznaka emitenta se ne mijenja.

OZNAKA VRSTE I KLASE PAPIRA OD VRIJEDNOSTI

IV

Oznaka vrste i klase papira od vrijednosti određuje se u CSD sistemu, u postupku kreiranja papira od vrijednosti.

Oznaka vrste i klase papira od vrijednosti definira se od jednog slovnog znaka.

Slovo u oznaci definiše vrstu i klasu papira od vrijednosti kako slijedi:

R- redovna (obična) dionica iz javne ponude

P- prioritetna dionica iz javne ponude

G, F, H- redovna dionica iz zatvorene prodaje

X, Y, W- prioritetna dionica iz zatvorene prodaje

Z- dionica za zaposlene (posebna klasa dionica, sadrži ista prava kao redovne dionice)

O- obveznica

Q- obveznica sa pravom preče kupovine

U- zamjenjiva obveznica

Redovne dionice emitovane zatvorenom prodajom označavaju se po emisijama slovima slijedom: G za prvu emisiju, F za drugu emisiju, H za treću emisiju, zatim se slijed ponavlja.

Prioritetne dionice emitovane zatvorenom prodajom označavaju se po emisijama slovima slijedom: X za prvu emisiju, Y za drugu emisiju, W za treću emisiju, zatim se slijed ponavlja.

Po proteku perioda od godine dana od dana registracije emisije kod Centralnog registra, redovnim i prioritetnim dionicama emitovanim putem zatvorene prodaje, korporativnom akcijom bez naloga emitenta, mijenja se oznaka vrste i klase papira od vrijednosti i to redovnih dionica u R, a prioritetnih dionica u P, bez obzira na oznaku koju su prije imale (G, F, H, X, Y, ili W).

OZNAKA KORPORATIVNE AKCIJE

V

Oznaka korporativne akcije na papiru od vrijednosti određuje se u CSD sistemu, u postupku kreiranja novog papira od vrijednosti koji se emituje radi zamjene papira od vrijednosti na kojem se vrši korporativna akcija. Novi papir od vrijednosti ima istu oznaku emitenta kao papir od vrijednosti koji se zamjenjuje, a oznaka vrste i klase se mijenja zavisno od korporativne akcije.

Oznaka korporativne akcije na papiru od vrijednosti se definira sa dva znaka. Prvi znak oznake korporativne akcije je slovo «K».

Drugi znak u oznaci je brojevi i definira redni broj korporativne akcije na istom emitentu bez obzira na vrstu korporativne akcije.

VI

Izmjene i dopune ovog uputstva donosi Komisija za hartije od vrijednosti Brčko distrikta Bosne i Hercegovine.

VII

Ovo uputstvo stupa na snagu danom donošenja na sjednici Komisije za hartije od vrijednosti Brčko distrikta Bosne i Hercegovine.

Broj: 30/04
Dana: 13.12.2004.

Zamjenik predsjednika Komisije

Božo Mojić, dipl.ek.